

Ona emen iru olerki. «Educación y Descanso», deritzan batzordeak bere aizkenengo konkurtsoan sarituak dira. Benetan olerki bikainak.

## *Nere Izarrari*

“Bertso bida bear ditut kantatu  
izarrai: zer zaidan gertatu...  
korputzak ar dezan deskatsu”.

Beraz, gure aurrekoak ere senti zuten:

- 1) izarrai kanta-bearra.
- 2) zer gerta zaien esanaz.
- 3) korputzak ar dezan deskatsu.

Aien sentipenarekin bat, orixe bera egin dut nik ere. Iru gauzok azaldu olerki onetan. 1) Nere Izarrari kanta, 2) gerta zaidana, 3) neure atsedengarrirako.

Aldi berean, IV'garren saillak onela eskatzen du: “Tema libre, relacionado con aspectos de la vida de la región vasca”. Euskal-bizitzaren agerkaietako bat dugu, beraz, auxe. Eta zoragarrienetakoa. ¡Izarrai kanta-bearra!

¡Gaur ere senti dezatela beste askok!

## *Nere Izarrari*

“Bertso bida bear ditut kantatu  
izarrai: zer zaidan gertatu...  
korputzak ar dezan deskatsu”.

Arratsik arrats zeru urrutian ñirñari,  
maite-kupiraz zagerkidan Izar argi:

beste askotan legez natortzu gaur ere  
ixilmixil bat izan nairik zurekintxe.

Aski izaten dut leiotik tinka (1) zuri so,  
biotz-axanpak (2) jaulkiz izketan jartzeko.

Orduonean zindudan, bai, aukeran jo,  
nire ixkutuak axaltzeko aboz-abo.

Zuk ez bai'duzu, lurtarrok lez, iñor saltzen,  
aditu-ala ixñlik duzu gordetzen.

Deitzen dizudan bakoitzean: “¡Nere Izarra!”  
darantzuidazu: “maite auf, seme lurtarra”

---

(1) Tinkatu, igual a pararse, apostarse.

(2) Cuitas.

ta amen zatozkit ainbeste luzeko bidez  
lagun gaixo oni "Gabon" ematera maitez...

Maitasunezko zure errukiaren argitz  
goza didazu zuk bekokia amaika aldiz,

biotz-kezkaen sarigarritzat, il-ondo, z,  
zaudeneko ortan Zeru bat dala adirazoz.

On ta otxana zera, zerutar argia,  
on ta otxana ta ixilla ta maitatia...



...Gaur, baña, Izarño maite orrek ba-zeneki  
zein beste dudan atzotik gaurko ikuspegi! (1)

Gogamenaren ortzeak odeirik ez dit;  
bat-batez, samin danak poz biurtu zaizkit.

Pakea sor zait, oskarbi orren pakea,  
Jaungoikoaren zolitasunez betea.

Nire baitako laiotzean azterkari,  
goi-argitara ona zer dudan nabari:

Samari'ko osin ura, Sikar'ko iturria  
eguzkitan, ta Yesu bertan exeria

antuxiñetik bere Ur bizia eskeñiz  
"Edan —esaten—, ez aiz egarriko berriz"...

---

(1) Panorama.

Eskale antzo urbil natzaio albetan; (1)  
edan dut, edan, Jainko onaren eskutikan...

Ta bertan... mundu guzia arkitu dut berri!  
Oro garden, bai, oro iztun, maitagarri!...

Ez nuen uste, ez, onen edergarria  
zitekeanik sor zaidan egunsentia!

Beste begiz dakusat orain izadia!  
Bestelako biotzez maite dut bizia!

Atzo miñarren negarrik ezin zeridan.  
Ta gaur pozarren malkoa dut begietan.

Zure susmurra (2) berbera gaur zoliago  
aditzen dizut, ta ulertzen obekiago.

Millaka izarño zaudete betiraunean  
giza-biotzak zuenganatu naiean...

Biotzak diraust, Zeru eder orren pean  
nola gizona onen gaizto ditekean...

Millaka izarño Jainko-geznari or ernai...  
Baña satorrak lur-zuloa baizik ez nai.

Ez ote, griñaz lañotuta dagolako?  
Ez ote entzungor zuen mintzaira aditzeko?

Ezin ulertu, Zeru eder orren pean  
nola gizona onen gaizto ditekean!...

---

(1) Con ansia.

(2) Confidencia.

Zuk beintzat jarrai niri izketan, Izar maite.  
Gaurkoz alare... Agur baña biar-arte...

Emen itxoingo dizut, gau ontan bezala.  
Ta gaur baño re obea arki nazazula!,

...zure irudira nakusazula... argia,  
on ta otxana, ta ixilla, ta maitatia...

